

No. 199. 1439. 6. Jan.

Das Kloster Seuslitz verkauft an Hans Seigericz Bürger zu Leipzig und Andres Müller zu Seigeritz (Seegeritz) die Barfussmühle.

Wir Anna von Ileburg eptisschen zcu Süzelicz, Elisabeth Slywin vicaria, Margaretha Slybin, Margaretha Küneke vnde Margaretha Meideburg dy eldesthen vnde gancze sammenunge gemeynlichen vnde er Mathias Döring minister zcu Sachsen vnde doctor der heiligin schrift, bruder Nicolaus Kleyne vnser gardian vnde vorweiser, Petrus Jhencz vnser moilmeister zcu Lypezk, bruder Günther Fisscher vnde bruder Johannes Lüticz vnser bichtiger, bruder Paulus Polan vnser vicegardian, bruder Mathias Boncz vnser köchmeister vnde Cristoffel Schönberg vnser voit bekennen vffentlichen mit dissem vnsern offen brieffe vor alle den, die dissen vnsern vffen brieff sehin hören adder lesin, das wir mit gutem vorrathe vnde wolbedachtim muthe vnde mit willen vnde wissen vnser öbirsthin vnde mit rathe vnser closters guten fründen vnde durch vnser closters besserunge willen, alz vmme vorterpnis wegin des brandis, den vns vnde vnserm obgnanten closter dy vordampften keczzer gethan haben, douon wir denne zcu grossem schaden komen sin, vnde dorumme zcu vordampten viel grossis vnde trefflichis schaden, der vnserm closter douon komen mochte, dem yncziten zcu wederstehen, so haben wir obgnanten Anna von Ileburg eptisschen zcu Süzelicz, Elisabeth Slywen vicaria, Margaretha Slywen, Margaretha Küneke vnde Margaretha Meideburg vnde dy gancze sammenunge vnde er Mathias Döring minister zcu Sachzin vnde doctor der heiligen schrift vnde vnser gardian vnde vorweiser, Nicolaus Kleyne vnde dy andern obgnanten ꝛ. den ersamen vnde wisen Hans Seigericz mitbürger zcu Lypezk vnde Andres möller zcu Seigericz^{a)}, Margaretha synem elichin wibe vnde allen iren erben vnde erbnemen vnde nachkommelingen mit gesampter hand vorkaufft vnde vorköuffen yncrafft disses briffes dy möil hinder dem Barfossencloster by Lypezk gelegen^{b)} mit aller zcugehörunge, alz mit wesen halczern visscherie vnde themmen, alz vnser gotshuß zcu Suzelicz bißher gehabt vnde gebrucht had, vnde dyselbe obgnante möil wir obgnanten Anna von Ileburg eptisschen zcu Suzelicz ꝛ. den obgnanten Hanns Seigericz vnd Andres Seigericz vnde Margaretha Andres elichem wibe vnde allen iren erben, erbnemen vnde nachkommelingen zcu rechtem erbe gelegen alzo erbgutis recht vnde gewonheid ist vnde nw hinfort lyhen zcu ewigen gecziten von vns vnsern nachkommelingen dy obgnante möil mit aller zugehorunge alzo obin berurth ist, vßgenomen alle gerichte obirste vnde nedirste, alz das closter vor alders bißher gebrucht vnde gehad had vff der obgnanten möil, vnde dornach awzgeslossin vnde genomen das Nwendorff^{c)} mit alle synen czinssen iarrenthin gerichtten vnde lehen zcu gebruchen volkommelichen, alzo ferre vnde weid alzo vnser guter wenden; vor sulche möil sy vns vnd vnserm closter Suzelicz gegeben vnde wolbeczald haben hundert schocz gut grosschen schildechten geldes Fryberger monce. Ouch sullen dy obgnanten Hans Seigericz vnde Andres Seigericz möller zcu Seigericz, Margaretha sin elich wip vnde alle ire

a) Seegeritz, Par. Plaussig. b) Die Barfussmühle. Vgl. No. 13 u. 23. c) Das Naundörfchen.